



卓氏遺書序

劉忠愍傳卓忠貞公事稱公有遺書十卷詩文五十卷爲公門人黃潮光所藏者久失其傳公裔徙居仁和亦有藏本而燼于兵火茲本則公孫左車求諸散軼于人間而哀次之者也憶公與方鐵



諸公慷慨殉國時去今二百二十餘年  
矣而公事尤烈烈人耳目間學士大夫  
求其片言隻字如天書雲篆八角垂芒  
之秘于琅霄太霞而不可得豈獨以人  
爲言重哉公之歿也蓋道衍實螫之能  
立熾公以除後患而不能使

英主遂終釋其憐才之感叅夷之憐也  
覆巢之下寧有完卵而不能斬其祀于  
累葉復興之後以萬乘之主馮天下以  
伸其怒雷霆所擊幾且糜爛亾餘而不  
能禁其遺文殘筆不緘滕于名山之藏  
以傳於後世忠義之植人心者不容泯

天固有爲之地者在也古來帶河礪山之爵誓雲臺麟閣之功名至崇高烜赫矣百世而下孝子慈孫想像其遺蹤類如石火電光空華幻影無可攬結之處而首陽之薇胥山之濤南史之簡汨羅之石弔古之士乍一目屬之有凜凜見

其人于千載之上者矧其出于呻吟得于揮灑如公茲集卽僅僅數十百言而忠義所蟠互可以動天地感鬼神孰有從而遏佚之者哉或曰公之忠義天所贊也遺文在笥詎無呵禁其不祥者天之未喪斯文也彼鬱攸惡得而崇諸余

曰不然公忠義之氣塞乎天地凡日月  
雲霞山川草木孰非寫公之文章其載  
在方策者公之緒餘也吾安知公之文  
不爲上帝所珍異不欲使與濁世之糝  
糠腐儒之糟粕同流浪于人間也因使  
六丁下而取之上以爲琅函蓋笈之封

下以爲海藏龍宮之集彼靈威之玉葉  
宛委之金書固有世人所不得而見者  
安知公集之燬不有火傳而不知其盡  
者耶然則茲編所存天固以其千百之  
一二畀公子孫使揭而行之令人知公  
之文章卽片言隻字猶可與日月雲霞

山川草木同焜耀於天壤間永永無終  
極也又安用以不幸不睹全爲公憾哉  
左車負命世之略與公媿才而尤與公  
同志故殷殷表章祖德自傳記遺稿以  
至族譜咸輯爲卓氏遺書二卷余因爲  
論次書之若公之行事自忠愍傳贊外

班班史策中可睹余不敢更爲贅也

天啓元年歲次辛酉季秋日

賜進士及第正議大夫資治尹南京吏  
部右侍郎前詹事府少詹兼翰林院侍  
讀學士南京國子監祭酒右春坊右庶  
子掌司經局事

國史編修江寧後學顧起元撰



卓氏遺書目錄

序畧第一

像贊第二

本傳第三

遺稿第四

逸事第五

褒典第六

廟碑第七

祭文第八

悼詩第九

族譜第十

祭文悼詩二種舊作蕪穢不載廣徵

天下文人新篇嗣刻集中遺稿中世傳西施菊

鮑襄陽周孟秩詩遺芳集周孟秩序葉繼道

志考係偽筆不錄此外有遺落世間者并望

郵寄以未流傳發之頓首白箋

卓氏遺書卷一

仁和卓發之輯

序畧

建文歿事之盛超越往古首推方希直及齊黃諸

臣乃希直當兵戈倥傯時日講周官井田而

齊黃裁抑諸藩削奪征討盡趣亾之器非保

定之材也忠貞公初遇

高帝首以諸王服飾僭擬



太子爲言知微慮始識超

高帝之先矣迨

燕王入朝密奏乘其不意徙封南昌以絕禍本是  
已制

文皇于掌股間較當日諸臣所議何異龍之與猪  
邪雖

文皇御極亦言諸臣皆欲害朕而敬言徙封內地  
若聽其言則干戈息矣是不獨憐其才蓋服

其識明非齊黃諸臣之匹也獨

少帝仁柔驚詫不能自決是爲禍生有胎而公臨  
刑猶恨不得爲兵官少行其志姚恭靖亦以  
公爲英雄才畧天下已定猶畏之如虎謂

文皇曰敬未歾

陛下未可安枕也是其才智較正學之迂疎又何  
啻千里直恨當國者位置顛倒局以度支迫  
不得展而說者謂恭靖力救正學而甘心于

公以平時為公所抑故快其私憤嗟乎恭靖何如人哉其救正學云殺孝孺天下讀書種子絕矣蓋實薄視正學以為此書生耳舍之可以得民而無恙于國非如公能移檄諸王鼓舞豪傑起兵北來為養虎貽患也是則

文皇恭靖皆公真實知己而所謂不負其君惟卓敬者真以殉國諸臣猶未免有負其君云爾使事前有幃幄之任事後無恭靖之言則當

日事勢實有可為而寧可以已成之局面抹殺真正英雄邪特以天命既定當風雨夜歸遇逍遙翁時便與

高帝遺篋中密詔相符類漢高之遇真人李靖之遇雨師毫髮不爽無可如何而特留此缺陷不滿之事以稍存蜂蟻之一線而但擬之于夷齊賢之于管魏偶之于殉國諸臣之列似未為深知公也方

少帝遜去時一代偉人碩士死事者雲集鱗萃獨  
樂清樵夫聞殺卓侍郎而顙天號哭棄柴自  
沉以死嗟乎國祚存亡之繫公一人也惟靖  
難之

文皇恭靖知之深山之樵採知之而其人李故  
少帝用之而弗能知卒祚促歷移而不可救也公  
遭難時從第四承事公匿跡仁和宋氏凡七  
世而始復卓姓公天文曆律地理兵刑之學

皆已無傳其門人所輯年譜行狀亦已散佚  
惟性理遺書及詩文五十餘卷家有藏本而  
嘉靖乙卯里有兵火復就灰燼獨誦其章奏  
直欲凌轢晁賈而子姓所流傳五七言詩奇  
嶮奔軼絕非元美于鱗諸子所能步武公曠  
世逸才猶可彷彿咳貌焉乃併史籍傳記氏  
族枝流彙爲二卷凡十篇豈獨卓氏之荆璆  
抑亦石渠之秘冊天漢之錦章也至如累世

朝野之論

列祖褒卹之音皆已唏噓傷悼憑弔英靈而謚議未行苗裔未錄省會未舉特祠夫烈不徇名死不念屬卽復褒封崇祀亦屬周粟矣而以斷臂納肝之臣無食德撫厲之典爲善者其懼焉是則表異振揚駕之壬午諸臣之上乃所以慰忠魂于在天厲臣節于來世爾發之識

明建文

皇帝臣

戶部侍

郎私謚

忠貞卓

公小像



像贊

鳳跋麇游山奔海峙伊周媿才龍比同志猛虎可  
馴亢龍有悔自託夷齊媿彼管魏

北郡李夢陽

又

英英卓公徵奇履虎曲突能謀逆鱗非忤歸誠故  
天流惜新主疇云孔壬乃寔愛女

瑯琊王世貞

本傳一

蘇子曰匹夫而爲百世師一言而爲天下法  
是皆有以參天地之化關盛衰之運其生也  
有自來其逝也有所爲故申呂自嶽降傳說  
爲列星古今所傳不可誣也孟子曰我善養  
吾浩然之氣是氣也寓於尋常之中而塞乎  
天地之間卒然遇之王公失其貴晉楚失其  
富良平失其智賁育失其勇儀秦失其辯是

孰使之然哉其必有不依形而立不恃力而行不待生而存不隨死而亡者矣故在天爲星辰在地爲河嶽幽則爲鬼神而明則復爲人此理之常無足恠者於乎斯言也求之古人在漢惟諸葛公在唐惟韓文公顏陸張許之數子在宋惟文李陸張諸君子在我

朝則卓公敬其首稱焉公生而資質秀敏穎悟絕人讀書十行俱下一見棄去終身不再讀

詩辭宏婉有一倡三嘆之音爲文精奇警拔磊磊落落類其爲人七歲時從羣兒嬉有見者異之曰斯兒骨髮殊異後日必爲名公卿惜血不華色爾性至孝讀書寶香山時年十五晨昏之禮雖遠不廢會夜歸值大風雨晦冥不知所之得一牛兕憑之而去及歸發門乃一黑虎也時以爲孝感所致旣而領鄉薦登洪武戊辰進士除給事申時

國初制度初立典則未備  
諸王服飾僭踰公乘間白  
上曰京師天下視效禮法綱紀攸先  
陛下自卽位以來汎掃腥羶澄清六合蓋欲家喻  
戶曉傳之萬世而無弊也聞

諸王在禁中服飾尚有擬

太子者然則何以令天下邪

帝笑曰卿言是吾未慮及此也由是益器重公而

或乃以太剛則折爲戒公謝曰敬一介寒微  
荷

上厚恩驟登清要官以諫爲名吾知盡諫諍之道  
上不負吾

君下不負所學而已禍福非所計也且吾聞居其  
位則思直其道苟直雖死不可回也爲之

益力陞授宗人府經歷再陞戶部侍郎

建文皇帝登極時

太宗皇帝已封燕矣公密奏乘其不意請徙封之  
其略曰

燕王智慮絕人雄才大略酷似

先帝顧其爲人必非久在人下者且北平天下都  
會地方廣邈士馬精強金元之興皆由於此  
今宜及其未備徙封南昌則羽翼旣翦變無  
從生萬一有之亦易控制不然彼志得行則  
謀無不遂大舉而南建瓴東下當此之時勢

如瓦解

陛下孑然一身雖有一二特立之士亦無能爲矣  
夫將萌而未動者幾也量時而可爲者勢也  
量時而爲非至剛者莫能斷未動而見非至  
靜者莫能察惟  
陛下留意焉疏入時

帝在便殿大驚手袖以入翌日召見曰卿何得出

此言



燕王骨肉至親卿雖慮事深長其謀當不及此公

叩首曰

陛下以

燕王爲至親楊廣之於隋文不尤親耶一旦讒言入耳父子之間遂行弑逆此豈人情也哉臣

言是願

陛下察之且

帝王之孝以保安社稷爲先小節非所論也

帝默然良久曰卿休矣吾方思之事遂寢

太宗皇帝南下時公已被執首責以不迎乘輿之

罪曰此小臣得非前日裁抑

諸王者今日爾復不臣我耶公厲聲抗拒辭甚

不謹且曰

先帝若依敬言

殿下豈得至此

帝怒欲殺之而憐其才美

命繫獄欲屈其志而復官之時使中臣諷之曰  
今上皇帝叔也

建文皇帝姪也事屬一家忠無二致公既盡心前  
朝何不移忠

今日昔管仲不死小白魏徵再事太宗故事可  
師何爲徒自苦耶公泣曰人臣事君有死無  
二足下以管仲魏徵爲言此非所以望敬也  
夫以武王聖德而夷齊尚不朝周

先帝正朔相承略無過舉一旦利欲迷心遂行篡  
弑吾恨不得請上方斬馬劍死得見

先帝於地下耳爾復欲我臣之亦何心哉

帝知公大義不屈然憐其至誠猶欲生之而姚廣  
孝不可以爲

陛下雖天下已定然兵革方殷若欲返駕燕都則  
必殺敬始可方今楚王尚強蜀王富盛敬雖  
一介書生實英雄才略也今若生之則彼得

行其志移檄諸王聲揚大義據東南之饒限  
長江之險鼓舞豪傑起兵北來

陛下未可安枕也豈非養虎自遺患耶昔吳王不  
殺范蠡而蠡卒滅吳王衍不殺石勒而勒終  
害衍人事有幾不可失也使

先帝果如敬言

陛下豈有尺寸土地耶

帝意遂決已而命斬之復夷三族公臨刑殊從容

但歎曰

國家養兵三十年一旦變生略無措置敬死有  
餘罪但恨不爲兵官得少行其志爾神色凜  
然經日猶如生公有高世大才而未及大用  
太宗皇帝甚愛之雖爲姚廣孝所譖其心實不忍  
殺之嘗歎曰吾

國家養士三十年不負其

君惟卓敬爾公博學多能美丰儀善談論天文曆

律地理兵刑靡不各造其奧尤邃性理有遺書十卷發明周子通書邵子經世之學詩文五十卷没入之日一室蕭然惟書畫數軸爾於乎公之大節與天地日月河嶽相與悠久者自有史冊書之固不俟球爲之傳獨念自入庠序時徃徃聞先輩鄉先生論公忠孝之事已欲爲執鞭而不可得茲來

京師得公門人黃潮光之子養正持其遺書及詩文并出公像以相示球拜起獻歛還其詩文且祝之曰斯集也自有鬼神造物爲之守護矧吾輩後學可不保重而愛惜之也耶謹撫公平生忠孝大節而證以見知聞知之實如此且以忠貞私諡之以伸平生所仰慕之意若夫行實之詳家世之美自有潮光之年譜行狀在茲不贅傳曰志士仁人無求生以害仁有殺身以成仁斯言在古固可數其人

矣况千百世之後者哉公當

建文之時死者亦非一士論者每每以公爲首稱焉豈非以其見之先而守之正故邪於乎真可與夷齊者倫也或者謂當時兵柄在公卽成敗有不可知者豈不然哉豈不然哉

廬陵劉球撰

本傳二

戶部侍郎卓敬字惟恭瑞安人七歲時相工曰此兒骨髮殊異必爲名卿惜血不華色耳年十五讀書寶香山風雨夜歸迷失道得一兕牛馮之歸比入門乃黑虎也洪武二十一年進士除戶科給事中陞宗人府經歷進戶部侍郎

建文初

燕王來朝敬密奏曰  
燕王智慮絕人酷類

先帝夫北平者強幹之地金元所由興也宜徙燕  
南昌以絕禍本夫萌而未動者幾也量時而  
爲者勢也勢非至勁莫能斷幾非至明莫能  
察

建文覽奏大驚翌日語敬曰

燕王骨肉至親卿言何得及此曰楊廣隋文非父

子耶

建文默然

文皇卽位責敬不奉迎怒欲殺敬而憐其才謂廣  
孝曰諸奸臣皆欲首先害朕惟敬諫徒封內  
地若聽其言則干戈息矣廣孝曰不然南昌  
地居下流金陵加兵特探囊取物耳使敬言

誠用

陛下豈有今日于是遂死敬臨刑從容嘆曰變起

宗親略無經畫敬死有餘罪神色凜然經日  
猶如生夷三族

文皇常曰

國家養士三十年唯得一卓敬後四十年劉球  
傳其事私謚曰忠貞敬立朝慷慨英偉美丰  
姿善談論凡天文地理律曆兵刑皆能究察  
詩文峭拔磊落所著文集五十卷

溫陵李 贊撰

本傳三

卓敬家安固之卓奧年十五讀書寶香山中嘗夜  
歸遇暴風雨避大樹下水至展轉遷徙竟迷歸路  
遙見林外有火光急趨赴之乃一小院落有讀書  
聲敬心稍自慰扣其門有一童子應聲而出曰先  
生知郎君將來使吾候之於此敬仰視其門有大  
書體玄二字爲扁遂相攜而入見一老翁坐長明  
燈下敬往揖之翁起相勞苦曰深山中昏夜遇風

雨得無疑懼乎敬曰歸省吾晨昏之常恐貽吾親憂雖甚勞無恨但得一燭尋路即可歸矣翁笑曰山中那得有燭但有少枯葉郎君且燎濕衣徐爲之計敬起解衣問向童子曰翁何姓童子曰先生不欲人知其姓每向人自稱逍遙翁又問汝何名曰吾名少孤敬疑其爲隱君子也脩謹進曰敬家只在下往來山中甚熟未聞有體玄之院亦未聞有逍遙翁之名敢以爲請翁曰昔體玄先生嘗

居逍遙谷中吾世業爲醫往來中條山中後因避難聞陶隱居有丹室在此因採藥南來結菴少憇不覺遂淹歲月不久亦還故山耳又問體玄爲何人翁曰此吾先世事郎君亦無用知也頃之燎衣訖又懇乞還家翁起謂敬曰郎君旣不肯畱以待旦吾有一牛可騎之而歸昏夜泥淖當有所恃無懼也敬大喜過望卽命少孤牽牛出又呼一童名少逸曰汝可將吾舊籠來就籠中出一僧帽謂敬



曰旣不能畱款以此帽爲贈敬辭曰吾爲書生平  
生志氣將期匡濟天下翁爲長者旣蒙訓教安得  
以此相戲翁曰吾昔亦嘗有志斯世後因所輔非  
材不用吾謀禍幾不測得此一籠始獲解脫不然  
豈復能生出宜秋門乎郎君第收此帽他日當自  
理會也敬却之翁但再三歎息而已敬遙窺籠中  
諸物悉籬桶工匠所用及僧家衣鉢耳兩童至門  
外敬乘牛致謝而別方出林牛行甚駛勢若飛禽

不復能控制身亦安穩無恐須臾已及門矣遙從  
牛背呼其家家人已就寢驚起隔牆應之曰夜已  
向闌若安得以此時冒風雨獨歸耶敬答曰吾得  
遇隱君子借一牛騎歸不然今夕必不能還矣舉  
火牽牛入牛忽抖擻咆哮化爲一黑虎而去室中  
人盡震驚而出比明尋訪體玄山居不可得數日  
後乃在縣西四十里陶弘景丹室故基旁有一古  
廟彷彿是雨夜所經行者其壁有潘閻夏日宿西

禪院詩卽東坡少日所見夜涼疑有雨院靜若無  
僧之筆也筆墨猶新循其路歸見虎踪歷歷尚存  
馬

按潘閔字逍遙大名入通易春秋尤以詩知名  
爲王繼恩所薦太宗召見賜進士第尋察其狂  
妄追詔罷之又多出入盧相多遜門下多遜嘗  
遣吏趙白交通秦王閔預有謀焉多遜敗宅隨  
毀廢閔時方在講堂巷藥肆中聞之知事將連

逮卽奔避多遜鄰家曰萬無搜近之理所謂擊  
下逃箭也其鄰匿之牆中閔作詩曰不信先生  
語剛來帝里遊清宵無好夢白日有閒愁事稍  
解服僧服髡鬚髮五更持磬出宜秋門變姓名  
入中條山朝廷圖形下諸路捕之不得潛居一  
寺中題詩鐘鼓上縣令見曰此必潘逍遙句也  
命召之又逃去投故人阮道時爲秦理掾諷秦  
帥曹武惠上言太宗赦其罪以四門助教處之

乃出真宗朝王繼恩敗籍其家其中緘題往來  
詩頌滿門事連宮禁上惡其朋結禍將不測閩  
自疑將逃去京兆尹先收繫獄上聞之詔中外  
臣僚與王繼恩交識及通書尺者一切不問釋  
閩罪以爲滁州叅軍卒泗上焦竑記

遺稿

絕句十二首

紅梅

誰教姑射飲流霞爛醉西湖處士家幾度春風吹  
不醒至今顏色似桃花

墨竹

洞庭木落水生波月入斜窓露氣多虞帝不歸秋  
自晚滿江烟雨泣湘娥

墨菊

我向玄都逢羽士自言種菊不多根  
灌園只汲臨池水歲歲開花帶墨痕

晚眺

浣花溪上雙楠木老杜草堂生夏寒  
門外青山三十六讀書終日倚闌干

梅影

華光淡墨鴛溪絹不似天公巧絕奇  
碧水晴沙風

定後空山茅屋月明時

二月梅

每日尋芳盡醉歸溪陰沙岸忽橫枝  
暗香浮動梨花月春色平分正此時

落梅

山中昨夜東風惡詩客柴門向晚開  
狼籍一庭春意半飄風雨半依苔

栽梅

風流東閣題詩客瀟灑西湖處士家雪冷江深無  
夢到自鋤明月種梅花

題扇

夜入瑤臺看月明吹簫惟有董雙成碧桃花外人  
騎鶴報道天書下玉京

山水

長松雨過秋陰滿日日攜琴自往回安得扁舟乘  
晚興載將山色過江來

春興

杖藜徐步出門去好花無數媚巖阿摘花歸去不  
成插坐對芳池春水多

又

雨過前山花寂寂日照嵐光翠欲滴長嘯一聲陰  
霧開習習清風滿岩壁

五言律一首

陳叔起畫

野徑通禪刹溪流沒釣磯小舟衝浪出幽鳥背人  
飛遠樹浮蒼靄空山淡落暉竹廬吾所愛真與世  
相違

七言律一首

寶香

此室不如斗來大此心不啻天樣寬白雲忽去山  
在戶紅日乍晴人倚闌一聲兩聲花鳥好千樹萬  
樹松風寒詩成大笑出門去長空浩蕩江水渾

古風二首

梅雨潭

橫空峭壁瀉飛瀑聲震淵霆搖地軸氤氳氣濕浮  
太空衝崖散作珠萬斛源頭直與銀河通半空簌  
落飛流淙此境定知無炎熱萬壑千崖灑晴雪

溪山行贈友人

溪山行行失路浩歌溪山怒山高旣莫陟水深豈  
能渡水深游蛟龍山高哮虎狼虎狼叱咤不可聞

蛟龍鼉負奚可當山自高水自深抱琴何處求知  
音知音既遇心神閒爲君說盡行路難溪山路鄙  
小行行勿復道蛟龍虎狼纔傷夷與君直上青雲  
梯

逸事

○科試考云卓敬登洪武第一科甲子解榜戊  
辰科瑞安三人卓敬榜眼郭真二甲林挺三  
甲

○憲章錄云洪武戊辰三月

上御奉天殿策試舉人賜任亨泰等九十九人進  
士及第出身有差特命立石題名於太學著  
爲令是科得卓敬齊泰

○遼國臣紀云洪武中敬除給事中一日與同  
官見適八十一人

士

○皇明通紀云壬午六月癸亥靖難先鋒至朝  
陽門外甲子屯金川門乙丑入城至巳巳

文皇卽位後乃誅戶部侍郎卓敬

○遺忠錄云

太宗在藩邸素聞敬名及臨朝特憐重之初姚廣  
孝以高僧負重名每爲敬所輕抑銜怨切骨  
必欲殺之

上猶不忍使中人諷之受官敬益不屈遂族其家  
妻劉義女楊奴發教坊

○立齋間錄云永樂二年十二月二十二日教  
坊司于奉天門題奏有奸惡婦卓敬女楊奴  
合無照依前例奉欽依是欽此



卓氏遺書 卷一 二十五  
○建文編年云樂清一樵夫逸其姓氏自山採柴歸聞

文皇帝卽位殺卓侍郎顓天號哭曰國旣就篡我不顛爲其氓遂棄柴投港橋下水歿

○忠貞錄云卓女沒入官奴宣德間赦放回籍歸於梅司巡檢陶姓者其言談頗類忠貞公見者爲之流涕稱曰卓氏女

○嘉靖辛亥長洲劉畿令瑞安岳伯顧問語劉曰瑞有先達卓公遺文散逸不傳有司之責也劉乃博訪其遺稿於里中緣公旣赤族而門人黃潮光者家復衰替其稿湮沒已久踰年乃得其詩文若干首于邑之弟子員曰采薇一歌尙垂不朽是亦足以傳矣遂刻之邑中

○江陰高賓知瑞安得公像傳于毀軸中乃立像於射圃亭又未嘉王文定嘗游平陽獲公

像及劉忠愍傳于邨學寃故笥中蠹蝕四旁  
唯公像巋然存若有神物護持焉又樂清朱  
諫游南鴈宕得劉傳于父老家又鄭曉袁袞  
皆有傳與劉傳畧同李夢陽槩括作小傳今  
李集失載

○邑令安福朱祀始卽西峴山以爲公祠王士  
翹爲令創田十畝又查北壇西畔隙地歲徵  
租以供祀事其後祠燬而邑令杜時登復之

皆在癸酉詔書以前歲辛巳兵憲吳自新移  
祀於邑治南偏天啓辛酉司理李若愚邑令  
康元穗重新之邑人劉康祉爲之記其郡守  
衛承芳所建江心祠在郡城北甌江之孤嶼  
中與文信公東西峙列

○南京戶部西廡舊有公祠弘治四年爲臨清  
李某所毀天啓元年夏侍郎汪應蛟請箕仙  
次公降箕有求廟食詩詩辭酷類平日昔伯

有之鬼著于春秋顧未有公孫僑其人耳詩  
云嗟余生安固移家在滄洲當年輔

皇祖自命伊與周燕子下金川姚髡恣辛螫烈士  
不顧宗三族濺寃鐵余沒爲明神春秋享廟  
食忽忽二百年堂宇傷湮沒天風吹游魂晝  
吟與夜泣帝令侈廢墜作廟以當歸君能明  
祀事當薦西山薇

褒典

○建文四年八月

文皇得建文時羣臣封事千通詞涉干犯者悉焚  
之曰彼食其祿自盡其心當國家危急之際  
在近侍獨無一言可乎又曰諸臣忠于

太祖故忠于

建文朕但惡其誘亂成法耳

○永樂十一年正月詔法司解建文諸死事臣

禁令又諭諸死事家遠親未拿者悉宥來告者勿理

○十三年五月

上諭三法司各處妄告奸惡擾害良善自今被告奸惡已提到官及未提者俱勿問但有指以奸惡爲由生事擾害者罪之

○二十二年

仁宗御極日劉諭尚書呂震曰建文臣家屬發教

坊司錦衣衛浣衣局習匠及各官家爲奴今有存者並宥爲民給還田土充軍者亦宥爲民

○洪熙元年諭羣臣建文死事輩皆忠臣詔從寬典

○弘治中給事中吳世忠請表祠革朝諸忠臣事

○嘉靖十四年給事中楊僕請表揚遜國諸忠

臣下禮部議

○隆慶六年

神宗御極閣臣張居正條議褒卹壬午諸臣事

○萬曆元年七月

皇帝詔曰革除間被罪諸臣忠于所事甘蹈刑戮  
有歿無二此皆我

太祖高皇帝所儲養忠臣義士我

成祖文皇帝當時亦有練子寧若在朕猶當用之

之語是諸臣罪雖不赦心實可原朕今仰遵  
我

聖祖遺意褒表忠魂激厲臣節詔書到日各地方  
有司官查諸臣生長鄉邑或特爲建祠或卽  
附本處名賢忠節祠歲時以禮致祭其墳墓  
苗裔儻有存者厚加卹錄

○十二年監察御史屠叔方題爲懇乞推廣明  
詔以慰忠靈事

陛下登極首詔褒卹革除諸臣但思忠臣已褒外  
親未宥又今省城有祠各府州縣士民未獲  
快觀又詔典已逾十年卹錄未見一舉乞  
勅該部通行省直備查前項外親有在戍者一體  
肆赦更令諸臣生長鄉邑各建特祠祀於歿  
節之日仍量贈官賜謚用示殊榮其墳墓苗  
裔從實奏聞修治錄廕而又頒行勘合立限  
完銷則天下後世臣子感奮無窮矣奉

聖旨該部知道兵部張學顏禮部陳經邦奏覆委  
應遵奉先年詔旨及依御史屠叔方所奏除  
齊泰黃子澄外諸臣發遣親故一槩除豁併  
爲建祠表墓錄裔易名以激臣節奉  
聖旨是

廟碑

夫振刷頽靡汎埽風塵仗黃鉞以康帝圖執  
朱旗而清人瘼者聖人之略也氣有前往義  
無反顧五鼎赴而如歸七族坑而不悔者烈  
士之勇也故夫王綱解則開八紘以乂之臣  
節弛則張四維以維之斯所謂言有正而若  
反道有悖而相濟者乎忠貞公名敬字惟恭  
溫之安固人也負公卿之骨髮則相表其奇

異蹈風雨之迷途則虎爲之嚮導學府多聞  
披玉軸之文史兵符默契窮金壇之秘訣陳  
仲弓閨門之德蔣公琰社稷之噐公實兼之  
洪武末國制草創儀章未立吳王太子或爭  
局於禁中梁國旌旗乃上儼於天子公以夕  
郎首建朝議固已晰釁萌通國體矣

高皇帝因大噐公晉宗人府經歷再晉戶部侍郎  
建文初載

燕國始建公覩其幾微密爲計畫語具劉忠愍  
所爲傳中卽賈生策諸王之勢鼂錯謀劉氏  
之安何能遠過而壯事難期老謀莫試尋至  
中州圯圻上國奔離士女同歎于殷墟鬼神  
共謀于曹社盖天步初夷屬捨攘而未定故  
人懷靡常舍

神聖其奚屬斯時也以

高帝之子纘戎



高帝之緒以

高帝之略龕夷

高帝之人新命舊邦非逐鹿之可擬子燕孫詒豈  
瞻烏之靡定公卽準管魏之擇主撫鐘虞而  
自怡其與更二姓事百君者當異日談也顧  
刀環築口吠堯之語不輟戔枝入頸送徃之  
情彌厲臧洪同日誓不俱生卞壺一門幾無噍  
類豈不痛哉昔伯夷之諫也太公扶而去之

公之死也少師與有力焉非古今之道殊忠  
佞之情異也以公材智邁於夷等生死能爲  
有無故也公歿

文皇帝追惜之曰國家養士三十年不負其君惟  
卓敬耳湯不以伐夏而敘沈淵之務光武不  
以翦商而紉采薇之墨允非天下之至公其  
疇能與於此嗣後二百餘禩京兆用

今皇帝癸酉詔書建祠冶城山側祀公等若干人

名之曰表忠所爲明

主恩厲臣節之意甚厚公生東甌而郡乏專祀英  
魂未妥鄉人興嘆蜀衛侯承芳來守是邦始  
卽中川文山祠右爲祠以祀公於乎方黃之  
死事非不烈也而石畫無聞胡解之委身非  
不智也而顯名危失前有曲突之謀後無銜  
璧之辱奮一時而超千祀者其惟公乎余也  
訪侯郡齋劇談芝桂覩公廟貌與薦蘋藻靈

爽如存嗟人骨之皆朽忠孝勞生悟光明其  
何暮擊牲爰告卽石爲銘詞曰

粵古貞臣動必以正圖國忘死見危授命砥  
柱不流疾風斯勁峩峩卓公忠出其性有明  
開闢地正天刊龍戰甫戢玄黃未乾九海波  
沸十嶽峯剡勇智不作華裔疇安

真人踵興閏統斯削帝緒中賡壇社如昨簞食壺  
漿稽首崩角命有廢興人無適莫公也矯矯

力抗其衝賈策定制鼂疏徙封委心王室削  
欵侯宗水投石拒心苦力窮無波不隨有作  
莫遂大夏顛隳一木焉制勇嬰鱗逆心安骨  
碎鼎鑊胡甘社稷是衛疇不自委曰國懿親  
公志邁世矢死靡分心堅百鍊義不二君陵  
厲白日晡靄高雲周民則頑殷彝已厚養士  
卅年庶幾無負厥有褒詞皇皇  
天口君義臣忠異塗同紐我

皇御宇丹書白麻閱彼忠魂一灑垢瑕旌祠冶城  
錫胤厥家仁風扇動義日光華海嶠甌鄉公  
之桑梓祠宇弗虔仰瞻奚以有美衛侯鳩傭  
相址高薨雲構層櫺電起長江孤嶼楚楚新  
宮摹文像卓作配西東姦雄泚顛烈士動容  
刊碑撰德今古英風

秣陵焦 竑撰

卓氏遺書卷二

仁和卓發之輯

族譜

譜序

生民之本在于氏族先王敦敘九族而邦國有倫  
故葛藟棣華之誼百世而不相忘自秦漢以來姓  
氏合而賜姓名氏之源混宗法廢而本支適庶之  
派淆然而官有簿狀家有譜系猶有糾合宗族之

誼焉至隋唐而降譜牒散佚則枝葉飄零其人之  
相離棄也相戕賊也又孰從而遏之而後世爲譜  
牒者又多侈大家世無疾痛慘怛之意安在乎類  
族辨物而使子姓相柔懷也余家故有譜而毀于  
忠貞公赤族時自忠貞公而上世次漉滅皆不可  
紀徙匿仁和而後子姓孤孑上世之事若存若亡  
更歷數世益復銷沉矣夫子孫而不錄其先人悖  
亂之行也乃採述舊聞據其名實欲後人知先世

艱難播遷之始與勤儉振厲之操使識孝敬之本  
夫譜所以合散而一殊使湮源斷緒各歸其宗如  
雲歸于山水歸于淵日月麗乎天草木麗乎土者  
也是以述前者據信後者實謀始者慎導從者簡  
布言者忠則一譜而五善具焉自人之不知有尊  
也于是乎悖自人之不知有親也于是乎疎乃說  
諄而不入語溢而不信斯亦建言者過也今據所  
知斷自十世以上明其世系已冠昏者錄焉爲譜

圖其間脩短出處異數乃列名諱生歿之紀爲家傳願先祖有美而弗傳後世何觀焉則志歿者之行事終始爲大傳夫姓者女之適而別者也姚嬀姬姒姓多從女睢鳩鵲巢皆本女行爲外傳然十世而前十世而後所以述祖貽後者不可以不載于是爲後錄二篇而系之以詩曰

明祚中廢天崩地坼峩峩忠貞難至見節如璧斯隕光完魄碎山岳聚魂滄海爲淚零傳播祖一世

三徙變姓易名孤懸如縷猗與王父中葉飄搖仁強智勇匹夫而豪猛獸欲拏鷲鳥將發范蠡居陶計然策越於惟王母葛藟紫之小星育孤恩斯勤斯參軍翩躚雲飡霞擷香吏乍辭歲星初謫孟叔英挺蕙蘭始花二母艱貞松邪栢邪仲氏游俠騎疊車屯近惟郭解遠則田文逸性煙霏素毫風駛洎人不來骨香泉裏皇妣蹇蹇德侔衛姜蓮花現瑞神栖衆香自託大悲如掌中菓還負衆生以爲

鰥羸言念劬勞搖搖罔極逝將去此適彼樂國

譜圖

始祖敦

璞

鑑

澄

廷俊

廷偉

廷佐

廷俊賢  
四子

文卿

爾康

明卿子  
向

明卿

爾昌

爾壽

文彥

爾臧

明卿子  
維宇

楫

發之

八月

因華

天中

生之

順卿

爾昭

人英

爾宣

爾律

良

元卿

有學

士奇

振聲

振玉

振藻

振德

士雅

振紳

士修

振纓

有立

士耀

方無嗣

一延偉

宗茂 祭

爾楨



爾嘉

廷佐正無嗣

理廷俊文炎賢子禺

芳毓

家傳

敦字惟厚號復初始徙唐栖贅于宋因冒外姓更名哲生卒缺宋氏生卒缺合葬石目十五圩生一男子璞

璞號景洩生卒缺配應氏生卒缺合葬石目十五圩生一男子鑑

鑑號養默生卒缺配朱氏生卒缺合葬石目十五圩生一男子澄

澄初名景清後以爲字號壽齋爲散官景泰庚午  
二月五日生嘉靖乙巳六月三日卒年九十六同  
季子居順德橋葬臯亭山朱頂峰之陰配姚氏生  
卒缺葬石目十五圩生三男子廷俊廷偉廷佐二  
女子長適周河次適邵某

廷俊字良才號棲溪成化庚子九月二十二日生  
嘉靖壬子十一月二日卒年七十三居花園橋配  
盛氏成化辛丑十月二十七日生嘉靖丙午六月

六日卒年六十六合葬壽齋公塋生四男子賢良  
方理二女子長適沈鸞次適張鸞

廷偉字良弼號晴川成化癸卯八月十七日生嘉  
靖癸亥六月一日卒年八十一居水溝巷東配夏  
氏成化庚子八月十日生萬曆癸酉九月十三日  
卒年九十四合葬臯亭山關王塢側沈氏正德乙  
亥十一月十四日生萬曆甲戌十二月三日卒年  
六十生一男子宗茂沈出公贈徵仕郎夏沈俱贈

孺人

廷佐字號生卒缺配張氏弘治丁巳六月十三日  
生嘉靖戊戌七月五日卒年四十二合葬石目十  
五圩祖塋右生一男子正無後繼子理一女子適  
莫廷瑚

賢字思齊號見齋弘治甲子十月二十六日生萬  
曆辛巳八月十八日卒年七十八居舊居之北配  
朱氏弘治乙丑三月四日生嘉靖己酉八月六日

卒年四十五合葬楊墳側邵氏正德癸酉二月十  
九日生嘉靖甲寅七月二十二日卒年四十二從  
子文卿葬楊墳賈氏嘉靖甲午四月七日生萬曆  
戊戌五月五日卒年六十五葬安溪文嘉塢沈氏  
生卒缺從子文炎葬赤岍生六男子文卿邵出明  
卿朱出文彥文炎沈出棟順卿賈出四女子長適  
姜恩朱出次適邵槃邵出次適陳章次適范鎮俱  
賈出公贈徵仕郎朱贈孺人

良字思仲號靜齋正德丁卯六月十一日生嘉靖  
丙寅十二月十日卒年六十居舊居更擴而左配  
姚氏正德丁卯五月二十九日生萬曆乙酉十月  
二十四日卒年七十九合葬臯亭山小嶺生一男  
子元卿

方字思義號敬溪正德壬申閏五月十七日生嘉  
靖戊戌三月二十日卒年二十七葬石目十五圩  
無嗣

宗茂字茂先又字楸德號日峰仕許州判官授徵  
仕郎嘉靖癸卯五月一日生萬曆甲辰五月四日  
卒年六十二配邵氏封孺人嘉靖甲辰二月十二  
日生萬曆甲辰八月十六日卒年六十一合葬臯  
亭山側章氏李氏萬曆丙子四月廿八日生生一  
男子縻李出四女子長適高廩次適胡心益次適  
張繹思俱邵出次適都士彥章出  
正字思端號小橋正德戊寅十一月一日生隆慶

巳巳十一月十七日卒年五十三繼配錢氏正德  
庚辰五月十三日生萬曆丙申八月十日卒年七  
十七合葬石目十五圩祖塋右無嗣

理字思倫號明齋爲散官正德辛巳九月十六日  
生隆慶壬申五月四日卒年五十二居西小河配  
俞氏嘉靖乙酉十一月七日生嘉靖乙丑十二月  
十八日卒年四十一合葬朱頂峰祖塋左繼配王  
氏生卒缺葬公塋左繼子文炎生一女子嬌適邵

晨夫俞出

文卿字章甫號心華中嘉靖辛酉鄉試六名嘉靖  
乙未十一月十四日生嘉靖丙寅六月八日卒年  
三十二配談氏嘉靖戊戌二月十七日生萬曆乙  
巳十月十一日卒年六十八合葬楊墳見齋公塋  
左繼子爾康一女子適鍾瀛係談內姪女張氏  
明卿字澂甫號月波仕光祿寺署正授儒林郎嘉  
靖乙未十二月十四日生萬曆甲午六月十四日

卒年六十居市南配郁氏封孺人嘉靖戊戌十二月十一日生萬曆丙午七月二十二日卒年六十九合葬武康西沈村側陸氏嘉靖乙卯正月十九日生萬曆甲寅八月七日卒年六十生四男子爾康爾壽陸出爾昌爾臧郁出五女子長適胡胤昌次適沈朝煒次適張可觀次適沈之忠次適范廷羔俱郁出

文彥字長季號日星國學生嘉靖戊午六月二日生萬曆乙酉九月二十日卒年二十八居月波公右葬計家渡配徐氏嘉靖己未十二月十三日生繼子爾臧生一女子適丁汝馴

樽字子年一字襄野號入齋初名顯卿郡學貢士隆慶己巳二月二十日生居市北配沈氏廣音隆慶庚午五月四日生萬曆丙辰八月十九日卒年四十七葬大公圩曰蓮冢側沈氏紉蘭萬曆丙申三月十二日生二男子發之音出生之蘭出一

女子瑗適吳孟麟係甥女范氏

順卿字豫甫號玉懷隆慶辛未正月三日生居水溝巷西配呂氏隆慶己巳十一月十七日生生三男子爾昭爾宣爾律一女子適朱昊

元卿字貞父號理軒嘉靖壬辰十二月十三日生嘉靖丙寅九月二十一日卒年三十五居市北配吳氏嘉靖庚寅九月二十七日生萬曆丁丑六月七日卒年四十八附葬靜齋八子生二男子有學

有立三女子長適平元鏡次適吳振先次適范濟民

榮字尚志初名上卿萬曆癸巳五月十日生居長橋西配沈氏萬曆甲午六月二十七日生生二男子爾楨爾嘉

文炎字孚民號太素仕鴻臚寺鳴贊嘉靖庚申五月十二日生萬曆丁巳二月十三日卒年五十八居長橋西葬武康赤岍配孫氏嘉靖辛酉十一月

二十五日生萬曆丁丑十一月二十一日卒年十

七附葬明齋公塋旁繼配孫氏嘉靖甲子正月二

十四日生萬曆辛丑二月一日卒年三十八合葬

赤岍側 氏生一男子禹繼出一女子眉適郭宗

謙 出

爾康字去病中萬曆壬子順天鄉試七名隆慶庚

午十月十五日生繼配李氏萬曆戊寅正月十五

日生萬曆丁未五月八日卒年三十葬阜亭山薇

香塢生一男子向

爾昌字仲昌仕光祿寺監事隆慶壬申七月十日

生側殷氏生一女子適崔錫圭

爾壽字幼恭國學生萬曆戊子五月六日生居水

溝巷配錢氏萬曆丙戌正月二十五日生萬曆丙

午十一月二日卒年二十一葬薇香塢繼配丁氏

萬曆辛卯十一月十五日生

爾臧字穉谷國學生萬曆丁丑正月二十八日生



配楊氏萬曆己卯八月十三日生一男子維宇  
四女子長適夏祚鼎次適孫應柅次適陳至道次  
適沈洪昌

癸之字左車萬曆丁亥八月十八日生配洪厓萬  
曆甲申十二月二十四日生側高霞萬曆戊戌十  
二月二十四日生三男子人月因華洪出天中  
高出

生之字遠條萬曆丁巳正月二十七日生配沈氏

萬曆乙卯六月十八日生

爾昭字朗生萬曆己丑十月二十四日生配陸氏

萬曆戊子五月十四日生萬曆辛亥八月六日卒

年二十四繼配胡氏萬曆乙未八月十三日生

一男子人英胡出一女子適 陸出

爾宣字粲生萬曆己亥八月十三日生配羅氏萬

曆庚子正月二十一日生

爾律字宮生萬曆辛丑九月十四日生配朱氏萬

曆壬寅四月二十日生

有學字長習號時所國學生嘉靖丙辰二月十三  
日生萬曆己丑十月二十八日卒年三十四配沈  
氏嘉靖癸丑閏三月一日生萬曆丁丑閏八月九  
日卒年二十五繼配湯氏嘉靖癸亥三月二十二  
日生萬曆癸巳十月十五日卒年三十一生三男  
子士奇沈出土雅士脩湯出一女子適李元龍湯  
出

有立字敦禮號如所嘉靖乙丑三月十一日生天  
啓辛酉十二月二十一日卒居長橋西配高氏隆  
慶己巳三月十六日生萬曆己丑五月二十三日  
卒年二十一繼配許氏隆慶庚午十月十六日生  
側梁氏生一男子士耀一女子側出

爾楨字 萬曆辛亥十二月二十五日生配吉

氏萬曆己酉六月十七日生

爾嘉字 萬曆乙卯二月初六日生配周氏萬

曆壬子二月十三日生

禹字肖生初名起蛟國學生萬曆癸未十月十八日生配張氏萬曆乙酉十二月二十一日生一男子方毓一女子適俞允和

向字漢生萬曆庚子三月十六日生配沈氏萬曆辛丑十二月二十七日生

維字字經甫萬曆丁未十二月二十五日生配沈氏萬曆丁未閏六月二日生

人月字珂月萬曆丙午四月十二日生配丁氏萬曆月日生

因華字佛華萬曆丁未六月一日生配石氏萬曆丁未七月二十日生

天中字 萬曆丁巳十一月二十日生配氏 萬曆 月 日生

人英字 萬曆甲寅四月二十五日生配許氏 萬曆丙辰十二月二十八日生

士奇字伯常萬曆丙子七月初一日生居界河配  
李氏萬曆乙亥六月十八日生四男子振聲振  
玉振藻振德

士雅字仲常萬曆甲申五月二十一日生居界河  
配姚氏萬曆己丑十一月二十九日生一男子  
振紳

士修字寧遠萬曆乙酉閏九月二十六日生萬曆  
癸丑二月十三日卒年二十九居西小河配皇甫

氏萬曆己丑正月十七日生一男子振纓

士耀字  
萬曆癸丑十一月二十一日生配劉

氏萬曆己酉九月二十二日生

芳毓字  
萬曆辛亥五月十一日生配潘氏萬

曆  
月 日生

振聲字先鳴萬曆甲午九月二十二日生配陳氏

萬曆乙未十月二十日生

振玉字孚尹萬曆丙申十二月一日生配劉氏萬

曆甲辰閏九月二十日生

振藻字君朴萬曆戊戌三月一日生配葛氏萬曆

丙午十一月初七日生

振德字 萬曆丙午八月二十三日生配 氏

萬曆 月 日生

振紳字 萬曆癸丑十一月十一日生配 氏

萬曆 月 日生

振纓字 萬曆戊申正月十一日生配 氏萬

曆 月 日生

大傳

靖難兵南下忠貞公敬以抗節族夷諱敦者其從  
父弟號四承事公跳而爲唐西贅唐西之贅蓋自  
瑞安而奉化而山陰三徙矣而子孫遂家于仁和  
是爲仁和卓氏是時諸歿節家皆勾黨籍公變姓  
名爲宋哲以贅宋故而其後因冒宋氏公晦迹沒  
世行義不傳杞宋之事孔子蓋傷之焉然公非有  
趙朔李固之客以奇節著聞也能於嬖徙匿而使

早氏遺書 卷三  
覆巢之下卒有完卵卓始繩繩矣方

文皇之怒株連告訐者伏屍百萬流血千里而不能盡快其意于卓氏此不足以知公哉

聞之父老曰西溪公以任俠聞于鄉閭暮年客吳舟子爲江淮盜醉之酒夜擊殺公投水中公子見齋公同漁人遡流求之歷冬入春不可得則呼天欲自沉乃厥遂浮于具區而顏色如平時額及肩有斧痕復大索盜得之吳昌市爰昇柩歸葬焉

自四承事公以下世有隱德凡六傳而生見齋公公椎外辨中讀書強記而以家業中衰乃學爲賈公爲賈則大羸五十年中屢仆屢起居賈之道仰取俯拾居賤操奇忍贄以竢昂直不爲人損一毛乃公爲賈獨不然嘉隆間歲大侵公悉出其儲粟而賤糶之又煮糜啖饑者而棺歿者人或謂若儲粟之謂何公曰吾所以儲非自封也東家閉出飽欲歿西家閉入饑欲歿吾衷其間足矣於是邑有

大徭役與非時軍興調輒推公公為立應又身所  
 樹腴田宅割而推諸息弟咸極所欲而它所散以  
 氣誼者不貲數買人法當破產而公更起家亦會  
 有天幸云然其窺盈縮識聚散必有深于陶計之  
 策如孫吳用兵申商行法者而人弗能知也願不  
 喜為醲侈食不割生衣布不浣室輪不藻恒與田  
 峻父老伍而獨喜延攬諸賢士時撫諸子謂之曰  
 兒曹知卓所以徙乎即不能如先侍郎毀宗以殉

志異日操觚管對公車拊循郡邑吏民而脩太傅  
 褒德侯之業隆隆振家聲即不能及而吾挾素封  
 以老而人咲此飽蹲鴟公何為者我何以瞑目於  
 是諸子咸感奮讀書文卿舉鄉蚤卒而明卿益博  
 通古文辭繇太學補大官丞郡國守令為明卿名  
 高故市牛酒請因明卿得交權公會詔舉郡國高  
 行賜爵一級已又春秋禮致之鄉飲賓公為一應  
 之即謝弗肯再用寧吾任哉公既用高年著名義



畫策善斷居傍邑無遠近咸取裁公得一言卽有  
所不可亦強爲解而公度其且解輒去之曰郭解  
一俠魁耳尚不欲操邑賢士大夫權今乃以汙我  
公姿癯而清善步履飲酒溫克好爲詩明卿之爲  
詩以風格著而公願取適情興近道理時時取宋  
儒先生遺訓筆而列之座右欬間從衲子方外  
遊大出貲建大善禪寺葺永清菴兩祐聖院造五  
杭橋者二人或謂公故爲福邪將市義邪笑不荅

自是人能賢公不能得謂所以賢蓋年七十八而  
卒公之病里人爭禱于社其歿也爲罷市野哭云  
自昔王孫以財雄汝山下然未有行誼著聞也漢  
高帝重困賈人令不得乘車以示辱而賈人擊鍾  
衣繡爲豪益甚至武帝時告緡而賈人困始極矣  
豈非以射利奪耕不佐公家之急故邪假令其時  
有孝弟樂施薄衣食急上供內行醇固若公者人  
主方褒顯以示黔首又胡摧辱也嗚呼厚藏愆予

色莊行違士之儒而賈者多矣若公非所謂儒而名賈者耶

日峯公弱冠為諸生輒厭去多博外家言奇服跌宕聊一謁選授燕山經歷隨判許州輒棄官倦游而歸家徒四壁立簞瓢屢空晏如也尤工于詩秋風鏃羽則磊塊嶮嶇春華冶游則綺麗掩映寓公白門則淒緊悲涼里居謝事則幽冲澹蕩因境以

得意因意以發聲直取於性情之真而濡澤口吻之際非支離刺擬規獵世好者比也嵇叔夜言服藥求汗未必得汗而魏情一集則泚然流離予以為詩亦然操筆刺句未必得句而勝情偶會則翩然奔注摩詰以禪超有襄陽以澹適真才不足半李杜而依性耐情有詞壇工力所不及者此可以知公之詩已公故拙首陽而工柳下游戲市上於人無所不與於言咲無所不盡雖擾狎之勿問也

然里中鮮衣肉食者卒不能讀公隻字而公獨抱其不朽於一人千載之知所得不既多乎所著有詩集二卷行世

余大父初艱嗣大母進側室邵而舉心華公七歲就外傳便能捉筆爲文有奇致嘉靖辛酉舉孝廉高第計偕上南宮體素孱弱不耐風塵乃遘病出自棘圍喟然曰臣精已銷亾矣進則乞歸養不則被短褐爲黃鶴山樵耳既復下第侘傺甚馳驅而

歸臥病四年竟卒公爲人堅孤耿耿自飭頤多才技爲詩在陶韋間刺有榆枋稿尤工小景畫余及見芳洲圖一幀絕似文徵仲而筆墨蕭散以意行之大盜刃于門持見齋公急公從間道出督家衆市兒鼓噪入盜惶懼釋見齋公去妾殷氏知文藝常侍案前校經史比病呼若翁遣之曰我往以嗣卜而女今我且病第它適毋令怨也卒無嗣仲弟以長子爾康爲之嗣

嗚呼我卓冒宋氏者蓋六世矣至我月波公奉

神宗改元詔褒恤殉國諸臣盡弛郤禁乃復卓氏  
云公美姿觀矚目如畫有衛洗馬風爲人烈亮薄  
章句竊與豪子弟學騎射劍術見齋公覺而督過  
公少年人不守檢柙事詩書而慕豪俠之行夫士  
齊鳴玉簪筆侍金華安事兵公始折節閉門博綜  
百氏所交傾海內豪傑近則杯醪遠則竿牘苟失  
一名下士公則耻之士或不爲公知至相語不比

於人數雖信陵執轡鄭莊置驛不過是也初爲舉  
子業與孝廉公伯仲同舍孝廉公崑精一業而公  
性跼蹐爲文直舉胃懷以是不合于累黍獨時時  
好稱詩取裁斷自大曆初爲國子生賦桃溪書屋  
詩詩聲滿留都及北上拜官光祿游日益廣諸名  
公卿咸忘年折行與公結爲盟而稱詩長安市中  
公隨乞歸侍養晨昏奉七箸操几杖者十年見齋  
公家埒素封爲人抱朴不游稅苑至公峩冠高蓋

好文章交游入則接進出則連駟居左右多窄袂  
希鞬執籌列肆者私謂卓家兒不類卓氏其衰乎  
乃相率訕笑去是時瑯琊歷下大函四明諸先生  
爲詞林冠冕公奉匱沃盥其間標位甚高比肩作  
者王弇州先生謂公曰江南文獻甲天下而錢唐  
中限之其東則吾吳業有二三子以至樵李語溪  
而盡其西則越有屠之田叔長卿沈之嘉則箕仲  
以至山陰未興而盡武林饒佳山水多君子而文

人未揚大業其在子乎起而賦詩有詞人武林社  
之句蓋割西越以奉公湯沐云比奉見齋公諱旣  
免喪詣闕補良醞署丞遷典簿光祿職尙方膳日  
與紹璫伍諸奸窟其中出入莫可究詰公廉明難  
犯初若相詬病卒自解去宮人久物故而餼藉自  
如公廉得之卒除其籍劉某給事武英殿與其兄  
金吾緹騎相緣爲奸以僞篆支歲餉下公庭訊緹  
騎故匿弟而身對簿氣張甚公徐以他語鈎之其

人立感悟出弟底法而已得末減爲鬼薪其練達  
吏治類如此已遷珍羞署正會

天子方採諸曹署郎及天下隱逸文章之士纂脩  
國史而公爲老詞人文章流傳日益著政府欲羅  
之史局具疏上請而銓衡又才公將出試劇郡其  
年六月疾卒嗚呼惜哉公于學爲汗漫游凡方術  
技藝能單體小品以上者皆與之嫗稗官小說支  
離覆逆之術皆所談覽尤輕財好施里中貧士待

以舉火病苦歿喪者咸赴公李某逋徭賦鬻子女  
都市其母牽兒道哭公見而愍之立傾囊篋得弗  
鬻人有侵其田廬者戒家僮勿與爭大地泡濤耳  
何爲尋于戈於蠻觸其讓之有負於公願銜公而  
叱之塗揣其意將在券也亟焚券以全交矣鍾生  
懋者奇士好稱詩毋被崇雉經婦姑素勃谿緣罪  
于生坐歿公故善令陳請啓禁視故人日暮故不  
出令趣之曰吾以父老白孝子寬十年不得信寧

與俱係耳令嘆曰嗟乎有歿友而無生親乎是夕  
深文解而生得論戍塞上然公與生實未之識也  
于是遠近咸誦公誰謂卓郎夸毗子哉儒則通儒  
俠則節俠過乃翁長者矣公通偉豁達與古豪傑  
埒令得都要津其建豎必不凡惜困于資格無能  
爲之推挽僅在散地嗟夫士豈能自爲才在世用  
不用耳又天性伉爽恒乘單舸香爐茗椀浮家吳  
越山水間累月忘返又稍喜遊乎酒人家釀新熟

與客浮白放歌聲出金石時發詼諧談言微中淳  
于東方之流乎中歲習禪寂結石禪菴栖託蓮花  
貝葉間是將以無生竟矣所著有卓氏藻林唐詩  
類苑卓徵甫文集詩集續集北遊稿行世

日星公婞直嗜奇好與諸文人游爲密交而落筆  
輒自異諸文人咸詫爲鬼語賈用不售則益悲憤  
成疾然志益銳負病入雍試方擗管吐血數升輒  
痛哭而返隨卒生平喜讀易著有易解時失其傳

公好古收蓄名玩不減海岳寶晉齋作字逼肖魯  
公精奕棋又好擊劍鬪鷄走馬睚眦感憤便成瘡  
疖類古少年場客時長習與公同氣類有辨才充  
工畫蘭精秦漢篆隸又往往迹于麴蘖人稱大小  
阮云

外傳

朱孺人者諱順秀字葆貞里有周媪善謀恒謂孺  
人非貧家所得有而見齋公笑哲如冠玉有胡僧  
異之曰是當起家朱父微聞之遂以字公當是時  
翁商齊魯間數歲不返而姑病家用益困孺人躬  
績紡以治甘脆不給則脫簪珥繼之十許年一日  
也於是公家益拓如故矣而未育子偶指謂孺人  
曰若胡僧與周媪言不驗哉孺人謝曰未也乃陰



爲置貳遂舉子文卿尋孺人亦舉子明卿夷其愛于文卿弗使諭也孺人精于握筭米鹽薪油皆自其手裁又耐御僮婢以寬承嚴故時得其心力卽公之善拓家祖白圭息法而大槩孺人成之也孺人固饒心計然一切從厚道隣有竊貨物者家人伺得縛之孺人陽驚曰吾托以致外家尙未發耶遂解縛使去當姑歿而執孺人手曰吾毋以報若願若得佳兒婦吾瞑地下矣然孺人竟不成爲姑

以卒當是時明卿僅十有四歲其後業成有官矣文卿舉於鄉矣所置貳復舉四子矣諸孫之舉者三矣與女及女孫所婚嫁皆名族矣公嘗置酒合內外親忽泫然而左頤文卿曰微而母孰有爾哉已右頤明卿曰孰與我共家若而母哉已又頤少子輩曰是有及有弗及者而母有遺慈也已又頤女弟之適張者曰吾卹而家不能若而嫂之卹而詳也文卿等皆感泣嗟乎婦人之妬者其情也方

其起艱難自爲功且覲其有子也率不聽置貳已  
度身無成不得已聽之置其詳許而陰不令近以  
終其身當其時自謂卽亾子終不願有它子其人  
又不幸而壽內願孺然乃始悔之詩云啜其泣矣  
何嗟及矣若孺人當壯齒知大義先妾舉文卿而  
後身舉明卿可不謂難哉卽不及見其成業所就  
爲不歎矣

見齋公中歲孺人朱貳邵已舉子而艱于孫也朱  
孺人爰逆賈孺人而進之孺人則謙約卑退事事  
當朱邵意懽其心見齋公以孺人事事當朱邵意  
也於是悉家事委孺人公以纖微起家家政稱明  
察孺人卽又事事當公意懽其心公且向衰諸子  
若婦齒相埒也孺人未舉子而爲諸子若嬭夙興  
夜寐綜理委悉于是又盡當諸子若嬭意懽其心  
而孺人勞心苦骨甚余童時聞孺人自述其初載  
猶隕涕云孺人強幹有才技嘉靖間里有倭警咸

棄家避匿公獨不易肆人爭以家緣投公質庫且  
 質且運往來搶攘亂兵中孺人以一身董護之見  
 齋公以貲豪而孺人粗衣椎髻不膏不沐雖減獲  
 有過之者而一遇間里貧厄則匍匐救之傾筐倒  
 皮無所惜性尤勤敏耕奴織婦皆與同勞苦故不  
 約而嚴桁無剩衣案無長物几席鑪椀無不當其  
 位置肅如也晚更以季中落勞悴佐之方垂歿之  
 日猶為季蠶繅且蠶且織竟以病卒孺人婺居當

戶修廢葺壞深自凌厲以冰雪之姿外禦其侮雖  
 子婦不假言笑咸惕惕不自寧其嚴冷如此而當  
 其艱辛盤錯之中則能婉婉柔順以得人歡心能  
 上人者能下人孺人蓋始終堅忍人也黃老申韓  
 似可同傳矣人亦有言健婦持門戶亦勝一丈夫  
 艱關育孤卒以自立卓氏之孟陶乎

余卓代有賢母其以貞節著者為談氏徐氏譚歸  
 心華公徐歸日星公兩公俱蚤世兩孺人苦節三

十餘年其冰蘖之操誦於閭里心華公狷狹自守  
譚更以才譖佐之內外裕如日星公懷奇負氣常  
主四方之游士徐盡其資以助間能商榷其人才  
能賢否及時事之得失皆有條理兩公艱於嗣息  
兩孺人垂樛木之仁爲廣飾妾媵卒不得舉子當  
兩公之歿也皆抱數歲弱女專屋而閒居躬爲桑  
織以對靈幃而繼嗣復無主乃以孤女娶婦受侮  
於他人蓋窮苦困厄久矣而無變志卒撫嗣子爾

康爾臧以能有家其嗣子又以姿性邁往不能齷  
齷事生產兩孺人相謂曰鼎不可以在車馬不可  
使守閭此孰與流俗小兒者乃歡終日如未嘗貧  
間察其細行談明察勤敏飲食器具不及豐侈而  
必精以旨庭宇灑掃必肅以嚴徐柔順宛委自初  
稱未亾人以至於老蓋足不越於戶外余惟周士  
大夫侯公之如江未漢廣以自湔祓王道賴以有  
成及至後世自當世所謂賢者多不能終其節而

卓行乃在女子置公卿將相於何地乎至茹荼集  
蓼於百年之間視决腹斷臂於一時者難易又何  
如也

余母沈姓名廣音生有夙慧值余父早孤大母賈  
孀居余母才識過人余父居荆榛霜露中不及於  
難及余既長學無生卽深信淨業置二姬侍余父  
而受具戒雲栖獨家緣繚繞乃罹愆逢尤不得脫  
離余復連蹇所至輒得奇窮後爲流俗所中復受

奇禍遠遊燕山白門越三年歸而余婦復感奇疾  
伶仃諸子乃如孤兒余母爲撫字如撫字余自歸  
卓事孀姑至於諸孫蓋德及於四世逮閭里親姻  
悉稱賢媛而余母形神俱憊矣歲丙辰邁疾乃深  
生厭離便欲舍家趨於非家常持厭若心七俱胝  
造准提觀音諸像但心志怯弱自疑淨土不能生  
忽聽誦貝典至是心是佛是心作佛語前疑乃釋  
值初度命余代禮懺法曰爲我告諸佛倘支那緣

盡願歸安養耳已知余向世尊悲泣請代輒懊然  
日汝平時爲我演暢念佛三昧今何復爲此此中  
衆苦煎迫吾欲久不歿而居此世者何也是夜夢  
遊一境樹林陰翳水流香潔中多蓮華華枝遠者  
如隔雲中近得一枝枝上端坐者里中比丘尼周  
也自言以倡造橋梁功德回向此國國名清泰汝  
不久當來此因手數花莖得四十七枝先是歲在  
戊戌余母病中夢墮暗室遙見琉璃光光中坐大  
士言汝疾尋愈當持地藏名字爰授策亦四十有  
七至是十餘年與余母年適會因自知時至復脫  
簪造地藏像而余日惶怖爲禮妙法蓮華踰旬病  
忽差飲食衎衎自憶此症必歿應以今日餘生還  
作歿想生平恚怒貪戀一時俱捨欲盡捐世相築  
庵山中乃徙居水西如鳥出籠深生歡喜日課名  
號萬聲向來信願雖具猶數懈怠行力未充自此  
精進數倍平時一日忽集眷屬揮手言別家人驚

異告歸歸則顏色暢說絕不言後事日方午令尼僧誦法華至如來以一大事因緣出現於世泊然西向始欲坐脫家人強之乃右脇吉祥而逝余先時設接引像置余母前大聲稱名助其繫念迨氣息絕方躡踊盡哀余妾高霞見普門大士現八臂像余母端坐大士掌中余復夢余母如霞所見而髯鬚如戟具丈夫相唱言菩薩清涼月遊於畢竟空衆生心水淨菩提影現中三唱而沒迨五七禮

懺次以余母及余累生所積微善如毛頭許皆爲回向西方龕燈忽現青光互揖黃光大如車輪不滅者久之更檢大藏中追拔幽趣皆云生天心未厭足最後得不空罽索真言經開誦百八徧亾者得生極樂每日加持沙土土中忽有蓮華形微妙殊好如是靈瑞更非一端因思衆生生歿輪迴愛爲根本欲奪愛根無如苦趣余母以深歷憂患故乃得潛息愛緣神栖彼國是則苦果還爲淨因經

言聞我名號乃至一念慈心喜悅者皆令來生我  
刹中如余母所證於都攝六根淨念相繼者未知  
云何而折攝二法俱已親承門庭施設畧盡於此  
更以顯密大乘定散衆善實爲導師夫地獄至急  
猶遂往生况自力他力其協焉如此哉至如委明  
是作二語則了達自心無不化往雖永明所稱何  
以加焉

去病婦氏李小字阿燈嘉善人父讀書說劍有俠  
聲爲女簡才倩以歸去病婦性樸直不知人間有  
機巧事生平無一抵欺語人欺之亦弗察察也少  
長於貴不自習衣直置褻敝食直置粗糲無綴綻  
輟釜之勤亦無時世珍綺之想去病爲庶子而繼  
於孟氏其嫡母郁也有其母陸其所爲後母談處  
三姑之間承顏調口憇然幾得其意而常若不可  
必于鱗所爲本避之而反及之有足傷者去病一  
技未售時多薄俗之感婦必前慰曰貴自子分姑



忍而需之臆釵貫酒以佐寥落當季子羸滕會稽  
携採之日而婦能慰好之故去病有不可友語者  
而語其婦李少習二南能說其大義其人貞淑得  
詩教多焉迨去病中歲始舉于鄉而李已先數年  
卒去病傷之日婦何至于此婦與人直披心胸遇  
事多遺忽不屑屑作計慮婦固無歿相也今則已  
矣使十年間無囂煩絮諍以撩其心必不摧折乃  
爾卽不幸摧折乃爾歿者人之大期也亦復何憾  
焉嗟乎如此而去病又安能已於腹悲也

陸氏盖亾而後知其能詩也歸朗生數年而卒卒  
之日爲別世吟酸楚感人因索其遺稿則清婉娟  
秀病時懺于世尊師僧爲具疏不稱意隨筆點染  
皆成四六甚駢麗平昔箋牘朗生至有不可辨者  
而事朗生則敬畏如嚴君然自爲朗生婦便食貧  
補紉瀚濯饘爨朝夕人有不任其勞苦隨坐病氣  
息奄然猶進貳于朗生冀其宜子姑或難之曰棄

婦以妬爲首奈何欲婦爲見棄之行閭里以爲高  
行而不知其爲才嬾古云懿厥哲婦爲梟爲鴟余  
恨古人不見今人焉

曰瑗者母適范蚤世余父撫爲女擇對吳生瑗性  
仁而氣柔事姑若壻惴惴焉如履春冰視子女搖  
搖焉如夕不至朝事舅姑與壻與子女之黨皆調  
之如醴遇歿喪疾病皆救之如焚其貧賤勞動以  
至憂患詬厲皆甘之如飴從來門內巨細皆獨持

迨病革履其庭遂如空舍然猶賓客起居纖悉縈  
念如平時時家人爲禮北斗司命余教以向病者  
稱禮無量光名號越七晝夜乃歿已復甦于是宗  
姻兄弟之人無不招執手絮別之語無不悉先人  
窶窵之計無不營殯殮飯含之具無不視託子寄  
女之事無不宛轉悲咽然後稽首西向曰自是不  
願生此世界願舍此報身直皈蓮國因檢殮飾嚴  
瑞像曰余願力已堅但生平無財施以此破結習

耳乃安隱而逝顏色不亂得年三十有六自歸吳  
至今日未嘗一日知有生人之樂手口心血俱自  
罄竭但求得意一人自謂未畢屈指平時閨閣之  
助無非細事及一遘變而吳生百事旣弛四體亦  
廢手足若痿蹙耳目類聾瞽卒以是發痼疾然後  
知生平之相其夫子者大也嘗讀古賢母之誡曰  
慎勿爲好好尙不可爲何況惡乎婦德以卑弱爲  
體種種聰明才識卽爲厲階故云無非無儀無攸  
遂如瑗可謂無之矣至如淨國因緣瑗恩愛深重  
似爲障礙然惟情深之人併歸一路則猛力過人  
不與淺薄者較遲疾矣况臨終正念旣如微火燒  
積薪皎日麗霜雪乎余生平願力遇臨終者咸勸  
一心西往於外傳中自余母外復得瑗

後錄一

古帝王之姓其初皆出于軒轅乃卓氏得姓或以  
名字郡國或以別族避仇皆不得所系迨戰國時  
卓氏始著于邯鄲一云淖氏乃魯淖姬楚淖滑亦  
云卓氏或後世省文如譚爲覃邴爲丙云自秦破  
趙遷卓氏卓氏夫妻推輦求遠遷邛州卽鐵山鼓  
鑄運籌策傾滇蜀之民其後著于南陽茂爲密令  
道不拾遺元始中天下蝗獨不入密界光武徵爲

太傅封褒德侯長子戎次子崇皆擢用自後卓氏俱不甚著聞入後漢曰膺爲先主將入唐曰雲居河南乾寧中以詩賦名入宋曰立字志道居福清著有西溪集曰鈞居長溪曰時敏居瑞安元豐乾道間舉科目曰庠紹興間初建臨淮庠揆方審勢廛井秩然曰琮字廷瑞家未春嗜學堅苦曰田字稼翁傳有三衢買舟詞曰契順皈釋氏蘇長公謫惠州順曰惠州不在天上爲持家信及佛印書詣

公公圖所以報順索書歸去來辭一篇曰子信家未春開慶中率邑人扞寇寇欲降信不屈歿之曰得慶字善夫爲秘書以忤賈似道出知漳州次年嘉禾產一莖九穗賜詔召還景炎中元兵薄城慶與家人訣曰柱傾維絕雖千百年何益寧前一尺母却一寸俄甲士至執慶并二子規權殺之入元至大中曰琰擅文學名于三山曰有見號壺雲學刻仙經訣著有大冊肯要入

國朝臨海曰有謙瑞安曰敬敬以殉國赤族從弟  
曰敦匿跡仁和自是枝葉稍繁布散栖水見于譜  
牒者凡十世其別見于奉化曰廸于福寧曰越于  
通山曰朝用于洛陽曰世彥于莆田曰文錫曰居  
傳曰爾曰邁皆弗能紀其世

## 後錄二

嗟乎自戰國至靖難師起千有餘年而名字支裔  
隨世磨滅不可得而聞則譜不立之過也譜不立  
則合族之道不存今功名著于春秋積金丘玉者  
豈少也至于懿親則疎矣夫庭幃家室人道之始  
縈回繚繞古云家難此衆苦之所出亦萬行之所  
歸也古今文士侈口皇帝王霸之業家有父子婦  
姑兄弟而不能治君子羞之故能潤色名行孝友

敦睦以治其一家而遡源返始如一人之身此亦  
豪傑特立之行非苟而已也然而四海八極其系  
皆分于一家而生于一人一人之分而爲跽人勢  
也而忍路人之君子處世貴能有益于物耳國家  
用才不過數事其或經緯天地通三日儒其或著  
述憲章不忘前古其或斷決有謀諳習軍旅其或  
明練風俗職任屏藩其或識變從宜不辱使命其  
或批鱗折檻逆命利君如此才節士行所珍有一  
于此足以潤物利生功蓋一世矣然我聚族而生  
氏某名某祇須臾事耳人生而不能知存亾夭壽  
之故呼吸營衛之根懜懜食息豈爲哲人若神農  
黃帝之學近而可尋也至彼家教典詭僞金石黃  
白房中之術皆可殺人深入教理邪正自辨矣然  
而縱得冲舉未能出世人生從何來歿從何去刻  
聖依稀之旨學人影響之談毫釐有差天地懸隔  
矣爰有五時四教三藏十二部之文豈徒七經百

氏之傳哉明非堯舜周孔所及也夫族氏者因生  
而有者也由一人之生推之千萬人之生又躋之  
于長生而本之于無生斯其至矣今世爲家範宗  
訓至世間法止矣北齊顏氏之訓家乃能以家業  
歸心以歸周孔而背釋宗深爲謬迷故并誌之譜  
末以竢後世天啓改元長至發之記于濤山堂

### 卓氏遺書跋

嘗讀雪菴和尚補鍋匠諸傳未嘗不  
唏噓欲泣想見其爲人及觀忠貞公  
不受僧帽事正如彭咸正則一種懷  
抱又爽然自失不忍爲雪菴諸人矣  
初傳公事爲劉忠愍乞傳者爲黃奉



常養正乃忠愍卒歿王不之逆而土  
木之難奉常慷慨殉之其風氣所感  
過于投書反騷諸子况在我後人邪  
願世間難捨無如身命而忠孝至性  
卽通實相若有爲法忘軀當節節支  
解時不生嗔恨者方于生歿大事有  
少分相應方無負吾翁輯書之意  
人月謹跋



